

ADMINISTRACIÓN LOCAL

MUNICIPAL

VILAGARCÍA DE AROUSA

Ordenanzas e Regulamentos

APROBACIÓN DEFINITIVA DO REGULAMENTO MUNICIPAL DE VENDA AMBULANTE DO CONCELLO DE VILAGARCÍA DE AROUSA

No BOPPO de data 21 de setembro de 2018 publicouse o acordo do Pleno da Corporación Municipal de Vilagarcía de Arousa, adoptado en sesión celebrada o día 26 de xullo de 2018, polo que se aprobou inicialmente o Regulamento Municipal de venda ambulante do Concello de Vilagarcía de Arousa.

Finalizado o prazo de 30 días de exposición pública, se que se teñan presentado reclamacións e/ou suxestións fronte ao mesmo,

Enténdese definitivamente aprobado o Regulamento Municipal de Venda Ambulante do Concello de Vilagarcía de Arousa, procedendo á publicación íntegra do texto:

REGULAMENTO MUNICIPAL DE VENDA AMBULANTE CONCELLO DE VILAGARCÍA DE AROUSA

CAPÍTULO I DISPOSICIÓN XERAIS

ART. 1. Obxecto

O presente regulamento ten por obxecto a regulación administrativa do exercicio da venda ambulante no termo municipal de Vilagarcía de Arousa.

Quedan fóra do seu ámbito de aplicación, as vendas ambulantes en barracas, atraccións de feira, camiións e postos desmontables co motivo da celebración das festas tradicionais, tanto no relativo ao núcleo urbano como aos núcleos periféricos de poboación do Concello de Vilagarcía, así como as que se poidan realizar no recinto feiral de FEXDEGA e aquelas outras que expresamente se determine por acordo da Xunta de Goberno Local.

ART. 2. Competencia e réxime xurídico

O presente regulamento dítase en exercicio das competencias que se atribúen ao municipio pola Lei 7/1985 de 2 de abril, reguladora das bases de réxime local e en cumprimento da obriga que atribúe aos concellos o artigo 72 da lei 13/2010 de 17 de decembro, reguladora do comercio interior de Galicia.



Martes, 20 de novembro de 2018

Núm. 223

Será de aplicación a esta materia, ademais do contido neste Regulamento, a seguinte normativa:

- Lei 1/2010 de 1 de marzo de reforma da Lei 7/1996 de 15 de xaneiro de Ordenación do Comercio Retallista.
- RD. 199/2010 de 26 de febreiro, polo que se regula o exercicio da venda ambulante ou non sedentaria
- Lei 13/2010 de 17 de decembro do Comercio Interior de Galicia
- RD 1/2007 de 16 de novembro Texto Refundido da lei 26/84 de 19 de xullo, xeral para a defensa dos consumidores e usuarios e normas complementarias.

ART. 3. Concepto e modalidades de venda ambulante

Consonte establece a Lei 13/2010 de comercio interior de Galicia, considérase venda ambulante ou non sedentaria a realizada por persoas comerciantes, fóra dun establecemento comercial permanente de xeito habitual, ocasional, periódica ou continuada, nos perímetros ou lugares debidamente autorizados en instalacións comerciais desmontables ou transportables, incluíndo os camións tenda.

A venda ambulante poderá ser exercida por calquera persoa física ou xurídica que consonte dispón a lexislación vixente, posúa a capacidade xurídica precisa e a condición de comerciante que establece a lexislación mercantil e cumpra cos requisitos establecidos no presente regulamento así como a normativa xeral e específica que lle sexa de aplicación.

O presente Regulamento será aplicable ás seguintes modalidades de venda ambulante que se desenvolvan no Concello de Vilagarcía:

- a) Venda ambulante en mercados periódicos ou ocasionais.** É a que se realiza mediante unha agrupación de postos en espazos de uso público, en lugares e espazos previamente determinados, cunha periodicidade habitual establecida.
- b) Venda ambulante en postos desmontables instalados na vía pública:** Aquela autorizada para un número de produtos, postos, situacións e períodos determinados.
- c) Venda ambulante en camións ou vehículos-tenda fóra dos mercados periódicos:** Aquela realizada nos citados medios e autorizada en zonas ou lugares determinados da vía pública de xeito habitual ou ocasional.

Corresponde á Xunta de Goberno Local do Concello de Vilagarcía a decisión sobre a creación de novos mercados periódicos ou ocasionais, mantemento ou traslado dos existentes, modificación do número de postos, así como a determinación do número, emprazamento e características dos postos instalados na vía pública de xeito habitual ou ocasional.

A creación de novos espazos para a situar novos mercados farase consonte ao indicado no artigo 72. 1a) da lei 13/2010 de 13 de decembro, asemade, farase unha consulta previa e non vinculante á asociación dos sectores que puideran verse afectados pola situación deses novos mercados, así como ao público en xeral en cumprimento do disposto na lei de transparencia.



Martes, 20 de novembro de 2018

Núm. 223

A venda ambulante á que se refire o presente Regulamento, só queda autorizada nos lugares datas que se determinen por acordo da Xunta de Goberno Local, estando suxeita á preceptiva licenza municipal e ás disposicións do presente regulamento.

ART. 4. Os mercados semanais

Os mercados semanais que tradicionalmente veñen celebrándose martes e sábados emprazaranse na contorna da Praza de Abastos de Vilagarcía, rúa Alexandre Bóveda, Arcebispo Lago, García de Caamaño, praza limítrofe con Valle Inclán así como as rúas Dr. Carús, Vergara, Martín Gómez Abal, Avenida da Mariña.

A Xunta de Goberno local poderá acordar a modificación da situación dos mercados semanais, atendendo a razóns xustificadas de interese xeral, necesidades doutras áreas ou servizos do Concello e/ou optimización da actividade de venda desenvolvida nos mesmos.

Para a instalación de postos de venda no mercado dos martes e sábado, non se outorgarán polo Concello concesións administrativas, autorizándose ocupación de vía pública.

No caso de que algún/s destes días sexan festivos, estarase ao disposto nas Ordes da Consellería de Economía e Industria así como aos acordos que se adopten ao abeiro da lei na Mesa Local de Comercio e posteriormente autorizados pola Xunta de Goberno Local.

Cando por motivos estritamente legais non se poidan celebrar os mercados en festivo, estes trasladaranse ao día anterior ou a outra data que estableza a Xunta de Goberno Local.

O horario de acceso ao recinto do mercado por parte dos/as vendedores/as será das 7:00 as 9:30 horas, quedando prohibida a entrada fóra do horario indicado e debendo quedar libre e expedito o recinto ás 15:00 horas.

Artigo 5. Mercado anual de flores

O mercado anual de flores, desenvolverase nas datas de defuntos como tradicionalmente se ven facendo, nos termos e condicións seguintes:

- Mediante solicitude previa, formalizada cada ano nas datas próximas á celebración de defuntos, dos/as vendedores/as ambulantes do sector, con autorización da Xunta de Goberno Local.
- Estarán autorizados para exercer a venda ambulante de flores neste mercado anual:
 - Os concesionarios/as autorizados que veñen desenvolvendo esta actividade de venda de flores nos mercados semanais.
 - As/os campesiñas/os autorizadas/os para a venda doutros produtos de colleita propia nas bancadas interiores nos mercados semanais, previa solicitude e autorización municipal, específica para a venda de flores (de plantación propia) na carpa habilitada a tal fin polo concello.
 - As florerías concesionarias de postos fixos exteriores que así o soliciten e obteñan a autorización específica para o exercicio desta venda na carpa habilitada polo Concello.



Martes, 20 de novembro de 2018

Núm. 223

ART. 6. Requisitos para o exercicio da actividade de venda ambulante

O exercicio da venda ambulante estará suxeito á previa obtención de licenza, para cuxa obtención deberá acreditarse o cumprimento dos seguintes requisitos:

- Ser persoa física maior de idade ou persoa xurídica legalmente constituída.
- Estar dado/a de alta, durante toda a vixencia da licenza e/ou autorización, no réxime correspondente da Seguridade Social e ao corrente de pago das súas cotizacións.
- Estar dado/a de alta no epígrafe correspondente do imposto de actividades económicas e estar ao corrente do pagamento da tarifa ou taxa, ou para o caso de estar exentos, estar dado de alta no censo de obrigados tributarios.
- As persoas xurídicas deberan acreditar os seguintes extremos: CIF, acta de constitución, estatutos e escritura de poder outorgada á persoa que asina a solicitude de autorización en representación da empresa.
- Ter contratada unha póliza de seguro de responsabilidade civil que cubra os riscos que puidesen derivarse do exercicio da actividade
- No caso de estranxeiros, deberán cumprir as condicións e requisitos esixidos pola regulación vixente en cada momento. No caso de que proceda dun país non comunitario deberá estar en posesión dos permisos de residencia e de traballo, e se procede dun país comunitario, deberá ter a tarxeta de residencia.
- No caso de venda de artigos alimenticios, estar en posesión do carné sanitario de manipulador de alimentos actualizado.
- Estar en posesión da autorización municipal correspondente e satisfacer as taxas /ou tributos fixados na Ordenanza Fiscal.
- Non ter débedas coa Administración de Facenda, AEAT e Concello de Vilagarcía

ART. 7. Postos e vehículos de venda ambulante

1. A venda ambulante realizarase en vehículos ou postos facilmente desmontables e con carácter estacional, para a venda de produtos propios de tempada (castañas, froita, churros...), ou ocasional, nos casos que así o acorde e autorice a Xunta de Goberno Local.

2. As instalacións que se utilicen polo/a titular da autorización, deberán reunir as condicións necesarias para que sirvan de soporte dos artigos que se expenden, debendo reunir as debidas condicións de seguridade, salubridade e ornato público. En ningún caso, estas instalacións sobrepasarán a superficie fixada para o posto autorizado.

3.- Os postos ou vehículos destinados á venda ambulante situaranse nos emprazamentos sinalados ao efecto polo Concello. Non poderán situarse en accesos a edificios de uso público, establecementos comerciais, nin diante dos seus escaparates e exposicións, nin en lugares que dificulten tales accesos ou a circulación peonil ou rodada.



Martes, 20 de novembro de 2018

Núm. 223

4.- As instalacións e/ou vehículos dedicados á venda de produtos alimenticios cumprirán os requisitos establecidos polas normas sectoriais que resulten de aplicación, especialmente as de carácter sanitario, e as que esixa o organismo titular da estrada na que se sitúen.

5.- O Concello poderá establecer as características, deseño e materiais dos postos de venda co obxecto de adaptalos á contorna da zona na que se sitúen.

6.- Prohíbese o emprego de ancoraxes ou elementos que danen o pavimento ou superficie sobre a que se coloquen os postos.

7.- Prohíbese a venda ambulante de peixe, marisco, produtos cárnicos e calquera outros para os que legal ou regulamentariamente estea prohibida esta modalidade de venda, tanto no núcleo urbano como nos núcleos rurais periféricos.

ART. 8. Produtos de venda autorizados

1.- Poderá autorizarse a venda de artigos téxtil, de artesanía, bixutería, marroquinería, calzado, confección, droguería, artigos de coiro ou pel, de ornato de pequeno volume, froitas, verduras, plantas, produtos de confeitaría, froitos secos, produtos envasados, produtos alimenticios, así como calquera outros produtos nos que a súa venda en réxime de ambulancia estea autorizada pola normativa estatal ou autonómica.

2.- Atendendo ás características concorrentes nos diferentes mercados e modalidades de venda ambulante, ao equipamento comercial da zona onde esta actividade se desenvolve, á demanda de consumo da poboación ou calquera outra circunstancia que así o xustifique, o Concello poderá limitar os produtos de venda autorizados ou o número de vendedores/as dedicados/as á mesma especialidade comercial.

3.- Consonte establece o artigo 74 da lei 13/2010 de 17 de decembro de comercio interior de Galicia, en ningún caso poderán ser obxecto de venda ambulante ou non sedentaria os bens ou produtos cuxa propia normativa o prohiba, e aqueles outros que, en razón á súa presentación ou outros motivos, non cumpran a normativa técnico-sanitaria e de seguridade.

4. En todo caso non se poderán vender alimentos ou produtos alimentarios non envasados por quen careza do certificado acreditativo de ter recibido formación en materia de manipulación dos mesmos.

5. O concello determinará, dentro dos lugares sinalados, os produtos obxecto de comercialización.

6. Os titulares de autorización de venda ambulante non poderán vender produtos diferentes aos expresamente autorizados e fóra da zona concedida. Calquera modificación ao respecto requirirá aprobación municipal.

7. Aos efectos desta norma, prohíbese a venda de vehículos realizada fóra dun establecemento comercial permanente, na vía pública ou en espazos de uso ou dominio público xeralmente en zonas de grande concorrencia de público.



Pola contra, non terá tal consideración a venda de vehículos efectuada a título particular e illadamente por parte dos seus titulares, entendendo por tales, aqueles que figuren con esta condición no permiso de circulación, que pretenda publicitarse na vía pública ou en espazos de uso e dominio público mediante a colocación de anuncios visibles en tales vehículos.

Non obstante, na medida que comporta un uso especial do dominio público, estará suxeita á previa autorización municipal, que deberán solicitar os propietarios dos vehículos, acreditando tal condición acompañando copia compulsada do permiso de circulación. Unha vez concedida tal autorización, que terá unha duración de seis meses, esta deberá ser exhibida en lugar visible dentro do propio vehículo. A inexistencia de tal autorización ou da súa exhibición dentro do vehículo permitirá a adopción das medidas cautelares e sancionadoras previstas nesta ordenanza e especialmente a estipulada no parágrafo 2 artigo 19, do presente Regulamento.

CAPÍTULO II

EXERCICIO DA VENDA AMBULANTE

ART. 9. Autorizacións

1.- O exercicio da venda ambulante, en calquera das súas modalidades, no termo municipal de Vilagarcía de Arousa requirirá a previa autorización do Concello.

2.- As autorizacións para o exercicio da venda ambulante concederanse pola Xunta de Goberno Local do Concello de Vilagarcía de Arousa; nestas autorizacións especificarase o produto obxecto de venda, datas e horarios do exercicio da actividade, superficie a ocupar en metros de largo e metros de ancho, lonxitude do mostrador en metros., e espazo mínimo a deixar libre na beirarrúa para o paso de peóns.

3.- O número total de autorizacións será fixado polo Concello en función dos espazos idóneos dispoñibles.

4.- O prazo da autorización no caso de venda ambulante en mercados será de 5 anos e a dos postos desmontables na vía pública será a que se determine pola Xunta de Goberno Local no acordo polo que se concede a autorización.

5.- A autorización habilitará para o exercicio da venda ambulante á/ao súa/seu titular. Non obstante e conforme ao que nela se determine, a autorización habilitará, ademais da/do súa/seu titular, ás persoas vinculadas a el mediante relación laboral.

6.- A autorización municipal é intransmisible excepto no caso de cónxuxe, descendentes ou ascendentes ata o segundo grao, por causa de enfermidade grave, xubilación ou falecemento do/a titular da mesma, logo da comunicación ao Concello e autorización pola Xunta de Goberno Local. A transmisión dunha autorización non afectará ao seu período de vixencia, que se manterá polo tempo que reste, ata a finalización do prazo de duración.



Martes, 20 de novembro de 2018

Núm. 223

7.- Asignarase un posto por persoa, sexa física ou xurídica. O número de autorizacións asignadas ás persoas xurídicas, non poderá exceder do 50% do número total das outorgables para cada zona.

8.- As autorizacións poderán suspenderse temporalmente por mor de obras na vía pública ou nos servizos, tráfico, imposibilidade sobrevida da súa celebración ou outras causas de interese público. Esta suspensión non xerará dereito a indemnización por danos e prexuízos aos/ás titulares dos postos afectados. A suspensión poderá conlevar a reubicación dos postos noutra zona.

9.- As autorizacións poden ser revogadas de acordo co disposto neste regulamento, sen que isto dea dereito aos seus titulares a indemnización ou compensación.

ART. 10.- Solicitud de autorizacións

1.- A autorización para o exercicio da actividade deberá ser solicitada polo/a interesado/a ou representante debidamente autorizado, en impreso normalizado no que se fará constar:

- a) Nome e apelidos, enderezo para os efectos de notificacións, número do DNI e letra de identificación fiscal e no caso de estranxeiros/as, o núm. do NIE. Estes datos tamén se farán constar cando a solicitude se formule por representante autorizado/a.
- b) Modalidade de venda que se pretende exercer e emprazamento solicitado.
- c) Mercadorías ou artigos obxecto de venda.
- d) No seu caso, tempo polo que se solicita a autorización e dimensións, expresadas en m² e metros lineais, do espazo de ocupación que pretende, indicando se a venda se pretende realizar en posto desmontable ou dende un vehículo.

2.- Á solicitude deberá achegarse unha declaración responsable na que se farán constar necesariamente os seguintes extremos:

- a) Que cumpre todos os requisitos para o exercicio da venda ambulante na Comunidade Autónoma de Galicia.
- b) Que está en posesión da documentación que así o acredite a partir do inicio da actividade.
- c) Que se compromete a manter o seu cumprimento no prazo de vixencia da autorización.
- d) Estar dado/a de alta no epígrafe correspondente do imposto de actividades económicas e ao corrente no pago da tarifa ou, se é o caso, no censo de obrigados tributarios.
A acreditación deste extremo farase, a opción do interesado/a, ben por el mesmo, ben mediante autorización ao Concello para que verifique o seu cumprimento.
- e) Acreditación documental de estar dado/a de alta no réxime correspondente da Seguridade Social e ao corrente no pago nas súas cotizacións.
- f) No caso de estranxeiros/as deberá acreditarse o cumprimento das obrigas establecidas na lexislación vixente en materia de autorización de residencia e traballo.
- g) Reunir as condicións esixidas pola normativa reguladora do produto ou produtos obxecto de venda.
- h) Estar ao día e non ter débedas coa AEAT, Facenda e Concello de Vilagarcía



ART. 11.- Procedemento de adxudicación de autorizacións para os mercados semanais

1.- As autorizacións concederanse en condicións non discriminatorias e o procedemento deberá garantir a transparencia, imparcialidade e, concretamente, a publicidade axeitada de inicio, desenvolvemento e fin do proceso.

2.- Atendendo ao número limitado de autorizacións dispoñibles debido á escaseza de solo público habilitado ao efecto, a duración das mesmas non poderá ser por tempo indefinido, sendo o seu prazo máximo de duración, cinco anos prorrogables a criterio e por acordo da Xunta de Goberno Local, de forma expresa, por idénticos períodos.

3.- Non obstante, os/as titulares das autorizacións sinaladas no apartado anterior deberán solicitar anualmente a súa renovación ata completar a duración máxima establecida. O prazo para solicitar a renovación será dende o 15 de xaneiro ata o 15 de febreiro de cada ano. Aqueles/as titulares que non soliciten a renovación neste prazo, ou se a mesma lle fóra denegada, perderán o seu dereito ao exercicio da actividade, quedando facultado o Concello para proceder á adxudicación mediante o procedemento establecido no parágrafo 5, deste artigo.

4.- A solicitude de renovación farase en impreso normalizado ao que se achegará o xustificante de pago da taxa municipal e a documentación que acredite o cumprimento dos requisitos establecidos no artigo 6 deste regulamento, o interesado deberá acreditar a continuidade da alta no réxime correspondente da SS.SS. durante o período de vixencia da autorización que se pretende renovar, mediante o informe de vida laboral.

5.- A convocatoria do procedemento e as bases que rexerán a adxudicación de novas autorizacións, aprobaranse pola Xunta de Goberno Local do Concello de Vilagarcía de Arousa. A adxudicación pola Xunta de Goberno Local, farase a favor dos seleccionados que cumpran os requisitos, condicionada á presentación do xustificante de pagamento da taxa municipal no prazo improrrogable de 15 días.

ART. 12.- Proceso de adxudicación para a venda ambulante en mercados ocasionais, en postos instalados na vía pública ou camións-tenda

1.- A concesión e renovación das autorizacións que habiliten para a venda en mercados ocasionais, en postos instalados na vía pública ou camións-tenda, determinaranse na resolución da súa concesión, atendendo ás características específicas dos produtos de venda, ás circunstancias concretas en que se outorguen, etc., sen que en ningún caso poidan superar os prazos e condicións establecidos no artigo anterior.

2.- As autorizacións poderán solicitarse en calquera momento, se ben sempre cunha antelación mínima de sete días hábiles e máxima de un mes á data da instalación do posto, polas persoas que cumpran os requisitos para o exercicio da venda ambulante, segundo o indicado nos parágrafos precedentes. Na súa solicitude sinalarase a situación que interesa, datas de ocupación, espazo a ocupar, dimensións do posto e produtos obxecto de venda.



Martes, 20 de novembro de 2018

Núm. 223

As autorizacións outorgaranse directamente aos solicitantes, se ben de existir máis solicitudes que espazo a asignar, teranse en conta os seguintes criterios para a adxudicación, valorados conxuntamente:

- Data de entrada da solicitude
- Número de postos dedicados á mesma actividade na contorna na que se solicita o espazo.
- Experiencia demostrable no exercicio da profesión, calidade do produto e dispoñibilidade de instalacións adecuadas ao tipo de venda a realizar.
- Achega de produtos de nova venda ou inexistente na zona do posto.
- Non ter incorrido en sanción firme pola infracción da normativa do comercio ambulante

De non recibir notificación da resolución expresa, entenderase que a solicitude foi desestimada por silencio negativo, segundo se establece no artigo 24 da lei 39/2015 de 1 de outubro de Procedemento administrativo común das Administracións Públicas.

ART. 13.- Contido da autorización

O Concello expedirá aos/ás titulares de autorizacións unha tarxeta identificativa en documento normalizado ou emitirá un acordo de autorización, que serán exhibidos polo/a seu titular durante o exercicio da actividade, de xeito que resulte perfectamente visible. Na identificación constarán, polo menos, os seguintes datos:

- Identificación e fotografía do/a titular ou persoa suplente vinculada ao mesmo mediante relación laboral.
- Follas ou documentos para a formalización de posibles reclamacións.
- Prazo de vixencia.
- Dimensións do posto.
- Produtos autorizados para a venda

ART.14.- Extinción das autorizacións

1.- Sen prexuízo do disposto noutros preceptos desta Ordenanza, as autorizacións extínguense por:

- a) Transcurso do prazo polo que se outorgaron.
- b) No caso das autorizacións renovables, non solicitar a renovación no prazo establecido para o efecto.
- c) Incumprimento do pago das taxas municipais correspondentes, dentro do prazo establecido ao efecto.
- d) Renuncia expresa da/o titular da autorización.
- e) Perda dalgún dos requisitos establecidos no seu outorgamento.
- f) Non asistir a tres mercados semanais consecutivos ou seis alternos, ao longo do ano, salvo causa xustificada que deberá poñer en coñecemento do/a encargado/a do mercado, quedando ao criterio do órgano que outorgou a autorización. A tal efecto considerase falta ao mercado semanal a non asistencia os dous días de celebración do mesmo (con carácter xeral, martes e sábado de cada semana).



- g) g) Falta de pago das sancións municipais que se impuxesen.
- h) h) Falecemento ou quebra do/a titular declarada mediante resolución xudicial firme
- i) i) Polas causas de revogación contempladas no presente Ordenanza.
- j) j) Por imposición de sanción administrativa moi grave, no seu caso.
- k) k) Supresión da modalidade de comercio de que se trate.
- l) l) Xubilación ou declaración de incapacidade da/o titular.

Salvo nos supostos de extinción polo transcurso do prazo, que operará automaticamente, os expedientes de extinción iniciaranse de oficio ou a instancia de parte, correspondendo a súa resolución á Xunta de Goberno Local do Concello de Vilagarcía de Arousa

A instrución do expediente comunicáraselle á/ao interesada/o para que presente as alegacións que considere oportunos no prazo de 15 días.

CAPÍTULO III

DEREITOS E OBRIGAS DAS PERSOAS AUTORIZADAS

ART. 15.- Dereitos

- a) Á ocupación dos postos de venda para os que estean autorizados/as.
- b) Exercer a actividade no horario e condicións establecidos.
- c) Presentar as reclamación e suxestións que consideren oportunas en defensa dos seus dereitos e intereses.

ART.16.- Obrigas

- a) Coñecer e cumprir a normativa xeral de ordenación do comercio, disciplina de mercado e protección ao consumidor e cumprir as condicións e requisitos esixidos pola normativa reguladora dos produtos que sexan obxecto de venda.
- b) Ter exposto en forma facilmente visible e lexible para o público a tarxeta identificativa ou documento acreditativo da autorización municipal
- c) Deixar limpo de residuos, desperdicios ou envoltorios o espazo no que exerce a actividade unha vez desmontado o posto, procedendo a depositalos da maneira que corresponda e no contedor apropiado segundo o tipo de refugallo.
- d) Conservar as facturas e albarás de entrega da mercadoría posta á venda.
- e) Ter un trato respectuoso coa clientela, cos demais vendedores/as, e empregados/as municipais.
- f) Comunicar ao Concello os cambios de domicilio e calquera outro que afecte á documentación presentada para obter a autorización.



CAPÍTULO IV INSPECCIÓN E RÉXIME SANCIONADOR

ART.17.- **Infraccións. Clasificación**

1.- O incumprimento das normas establecidas no presente Regulamento así como das determinadas na normativa reguladora do comercio retalista e da defensa dos consumidores/as e usuarios/as, dará lugar á incoación do correspondente expediente sancionador que se axustará ás determinacións dos artigos 63 e seguintes da Lei 39/2015 e normativa que a desenvolva.

2.- As infraccións clasifícanse en leves, graves e moi graves.

2.1.- **Serán faltas leves:**

- a) A non retirada do posto dentro do horario establecido.
- b) Non expoñer en lugar visible a tarxeta ou documento de autorización municipal.
- c) Non comunicar ó Concello os cambios de domicilio da/o titular da autorización.
- d) Empregar megáfonos ou altosfalantes sen autorización municipal.
- e) Calquera outra infracción ao disposto neste Regulamento que non estea cualificada como falta grave ou moi grave.

2.2.- **Serán faltas graves:**

- a) A alteración da orde pública por discusións.
- b) O desacato ou desobediencia ás disposicións, mandatos ou ordes do Concello por medio de calquera dos seus membros, axentes ou funcionarios competentes nesta materia.
- c) As modificacións na estrutura das instalacións ou postos sen autorización ou incumprindo as normas ditadas polo Concello ao respecto.
- d) As defraudacións na cantidade e calidade dos xéneros vendidos.
- e) Non acreditar con factura ou albará xustificativo a correspondente procedencia da mercadoría á venda para a súa posible comprobación e control.
- f) A venda de artigos distintos aos autorizados.
- g) Non estar en posesión do carné de manipulador de alimentos cando a actividade que desenvolva así o requira.
- h) Non instalar o posto no lugar asignado para tal efecto.
- i) A reiteración de calquera falta leve no transcurso de un ano desde a comisión da primeira.
- j) A ocupación do dominio público con módulos ou vehículos cando non estea expresamente autorizado.



2.3.- Serán faltas moi graves:

- a) O exercicio da actividade por persoa diferente da autorizada ou do seu suplente (persoa vinculada ao titular por relación laboral)
- b) A instalación dos postos sen autorización municipal.
- c) A venda de produtos en estado tal que poidan causar dano para a saúde.
- d) A venda de produtos que vulneren as leis de propiedade intelectual e industrial.
- e) O incumprimento das disposicións sanitarias aplicables ás instalacións ou produtos que se vendan.
- f) A reiteración de dúas faltas graves dentro do ano.
- g) Tirar ou deixar no dominio público o lixo ou refugallos da actividade.
- h) A falta de ornato e limpeza das instalacións e da súa zona circundante.
- i) Non ter perfectamente visibles os prezos dos artigos postos á venda.

A aquelas infraccións da presente ordenanza que sexan concordantes coas establecidas no R.D. Lexislativo 1/2007 de 16 de novembro xeral para a defensa de Consumidores/as e Usuarios e na Lei Galega 2/2012 de 28 de marzo de protección xeral de Consumidores e Usuarios/as, seralles de aplicación o réxime de infraccións e sancións previsto no devandito texto legal, así como nas normas que o desenvolven.

ART. 18.- Sancións

1) As faltas tipificadas neste Regulamento sancionaranse coa imposición de multas na contía que se especifica neste artigo sen prexuízo da indemnización exixible polos danos causados ao Concello.

2) As faltas leves sancionaranse con apercibimento ou multa entre 30 e 100 euros, as graves con multa desde 101 a 300 euros e/ou suspensión da actividade do posto ata 15 días, as moi graves con multa entre 300 e 900 euros e/ou coa suspensión da venda no posto ata 30 días ou revogación da concesión do posto, ata coa posibilidade de chegar a comisar a mercadoría nos casos de venda de produtos non autorizados e nos casos legalmente establecidos.

Ademais, no caso de infracción moi grave, poderá impoñerse a sanción de prohibición para o exercicio da actividade en todo o municipio, por período de ata 3 anos. Esta sanción aplicarase acumulando ás contempladas para as infraccións moi graves (Revogación da autorización sen dereito a indemnización e comiso da mercadoría)

3) Todo/a vendedor/a sancionado/a economicamente non poderá exercer a venda en tanto non aboe a contía da sanción.

4) Correspóndelle ao Sr/a. Alcalde/sa-Presidente/a a imposición de multas e demais sancións, agás as moi graves, que serán competencia da Xunta de Goberno Local do Concello de Vilagarcía de Arousa.



Martes, 20 de novembro de 2018

Núm. 223

ART. 19.- Retirada ou comiso de mercadorías

No caso de reiterada pretensión dalgún/ha vendedor/a de exercer a actividade sen a correspondente licenza, poderá serlle retirada a mercadoría sen dereito a indemnización.

Esta medida terá carácter cautelar, e garantirá a efectividade do cobro das sancións que correspondan.

Igualmente, cando se atopen á venda produtos que vulneren a normativa sobre propiedade industrial ou intelectual, poderá procederse ó comiso das mercadorías, procedendo á formalización da denuncia ante a autoridade competente, e á aseguranza da mercadoría como proba da infracción cometida.

Para o caso de que se estea realizando a venda ambulante de vehículos na vía pública ou en espazos de uso ou dominio público á que se refire o artigo 7.7 deste Regulamento, o Concello a través da Policía Local, de oficio ou a instancia de parte, poderá ordenar a retirada do vehículo e o seu traslado ata o lugar habilitado ao efecto como depósito, tendo dereito a percibir este servizo de retirada, traslado e depósito a correspondente taxa, que deberá ser aboada ou garantido o seu aboamento como requisito previo á devolución do vehículo ao seu/súa titular.

DISPOSICIÓN TRANSITORIA

1.- Os/as comerciantes, titulares de autorizacións e concesións no momento de entrada en vigor desta norma, conservarán a mesma ata o remate do prazo de vixencia, entendéndose o mesmo de cinco anos contados a partir da entrada en vigor do presente Regulamento, sen que proceda a renovación ou prórroga das mesmas.

2.- O prazo de vixencia das autorizacións a que fai referencia o artigo 10, computarase dende a entrada en vigor deste Regulamento.

DISPOSICIÓN FINAL

A entrada en vigor deste regulamento producirase ao día seguinte da súa publicación no Boletín Oficial da Provincia e non modifica os dereitos e obrigas adquiridas polos usuarios e usuarias con anterioridade, naquilo que non estea especificado nel.

Vilagarcía de Arousa, a 12 de novembro de 2018.

O alcalde-presidente

Alberto Varela Paz

